



**KEVCAI LIJCHOJ NTXIV
HAUV HAUVPAUS KOOMHAUM HMOOB
NTAWM COV NTSEEG YEXUS
THIAB KEV KOOMTES QHIA TXOJ MOO ZOO**

By-Laws of the Hmong District of the Christian and Missionary Alliance

2022 Edition (*White Hmong*)

TXHEEJTXHEEM

Zaj Lus Coj	1
Tej Lus Txhais	1
Phaj I: Lub Npe.....	1
Phaj II: Lub Homphiaj.....	1
Phaj III: HKM Kev Tswjhwmm.....	2
A. Lub Rooj Sablaj Txwmxyoo	2
1. Sijhawm Sablaj Txwmxyoo.....	2
2. Cov Kavxwm Thaum Sablaj Txwmxyoo	2
3. Cov Tswj Rooj Sablaj Txwmxyoo.....	2
4. Feem Muajcai Sablaj (Quorum).....	3
5. Txojcai Tswj Rooj Sablaj.....	3
6. Txojcai Tswj Kev Xaivtsa	3
B. Lub Rooj Tsavxwm Ntawm HKM.....	4
C. Tej Phab Haujlwm (Department) Ntawm HKM	5
D. Cov Kavxwm Lwmyam (Standing Committees).....	5
1. Kavxwm Tawm Ntawv & Tsawbkws Ua Xibhwb (TTX).....	5
2. Kavxwm Txhawb Kev Xa Moo Zoo (Mission Mobilization)	6
3. Kavxwm Tshuaj Nyiajtxiang	7
4. Kavxwm Kevcai Lijchoj Ntxiv (KKLN)	7
5. Kavxwm Nrhiav Chaw Sablaj Txwmxyoo	7
6. Kavxwm Sawvcev HKM Mus Koom C&MA Rooj Sablaj Txwmxyoo	7
7. Kavxwm Saib Peev Nyiaj Pab Cov Kawm Vajluskub	7
8. Kavxwm Niamtsev.....	8
9. Kavxwm Txivtsev	8
Phaj IV: Cov Xibhwb	8
A. Xibhwb Kev So	8
B. Xibhwb Nyiaj Hli	9
C. Kev Nojhaus Rau Cov Xibhwb Raug Hloov Haujlwm.....	9
D. Xibhwb Kev Fajseeb Kho Mobnkeeg (Health Insurance)	10
E. Xibhwb Kev Cobqhia (Pastor Retreat)	10
F. Xibhwb Nyiaj Foobxab (Burial Fund).....	10
Phaj V: Ntawv Tso Cai Rau Txwjlaug Ua Vajtsv Haujlwm	10
Phaj VI: Nyiaj Pab HKM.....	10
Phaj VII: Nyiaj Pab Cov Kawm Vajluskub.....	10
Phaj VIII: Kev Daws Teebmeem Hauv Pawgntseeg Thiab HKM	11
Phaj IX: Kev Hloov	11

ZAJ LUS COJ

Hauvpaus Koomhaum Hmoob (Hmong District, herein after HKM) ntawm Cov Ntseeg Yexus thiab Kev Koomtes Qhia Txoj Moo Zoo (The Christian and Missionary Alliance, herein after C&MA) tau tsimtsa raws li kevcai hauv xeev Colorado, thiab muaj cai ua Vajtswv haujlwm puv npo raws li nomtswv Colorado tso cai.

Txawm yog C&MA twbyeej muaj phau Kevcai Lijchoj tiav log lawm los phau ntawv Kevcai Lijchoj ntawd yog tswjhwms mus dav-dav xwb. The C&MA tso cai rau txhua lub Koomhaum nyias muaj nyias cai los tsim muaj tej Kevcai Lijchoj Ntxiv (By-laws) los tswjhwms lub Koomhaum ntawd. Yog yuav ua kom tiav cov Homphiaj nram no, HKM yuavtsum tsim kom muaj ib cov Kevcai Lijchoj Ntxiv los rau HKM tau siv raws li nram no.

TEJ LUS TXHAIS

Tej lus txhais (definitions) hauv qab no siv tau los txhais tej kevcai lijchoj ntxiv hauv phau ntawv no:

Tsa (appoint): Nrhiav, pomzoo, lossis xaiv ib tug lossis ib pab twg los tuav ib tes haujlwm yam tsis muaj kev xaiv lossis pomzoo los ntawm lwm pab.

Taw (nominate): Tso ib tug npe los sib tw nyob hauv kev xaiv tsa rau ib lub meejmom.

Xaiv (elect): Pomzoo ib tug los rau ib lub meejmom twg los ntawm kev tawmsuab ntawm ncauj lossis pov ntawv.

PHAJ I: LUB NPE

Lub Koomhaum no npe hu ua Hauvpaus Koomhaum Hmoob (txij no mus siv HKM) ntawm cov Ntseeg Yexus thiab Kev Koomtes Qhia Txoj Moo Zoo (txij no mus siv C&MA).

PHAJ II: LUB HOMPHEIJ

Txhawb nqa Yexus Khetos uas yog tus Cawmseej, tus Ntxhuav kom Dawbhuv, tus Khomob Zoo, thiab Tus Vajntxwv uas tseem yuav rovlos; tshajntawm Nws Txojmoo Zoo kom tiav; pab tej Hmoob ntseeg Vajtswv los ntawm kev tsim pawg ntseeg tshiab, thiab rub sawvdaws los uake, kom muaj peevxwm mus tshajntawm rau cov tsis tau ntseeg; thiab qhia cov ntseeg tshiab ua Yexus thwjtim, cob lawv mus ua Vajtswv haujlwm, thiab xa lawv mus tshajntawm Txojmoo Zoo thoob ntiajteb.

PHAJ III: HKM KEV TSWJHWM

A. LUB ROOJ SABLAI TXWMXYOO

1. SIJHAWM SABLAI TXWMXYOO

Lub rooj sablai txwmxyoo ntawm HKM yuav muaj nyob txhua lub xyos. Xyoo twg uas muaj xaiv Thawj Tsavxwm ces muab tso rau lub 6 hli. Xyoo twg tsis muaj xaiv Thawj Tsavxwm ces muab tso rau lub 6 hli lossis 7 hli.

2. COV KAVXWM THAUM SABLAI TXWMXYOO

Vim muaj haujlwm ntau yam yuavtsum tham thiab txhimkho thaum sablai txwmxyoo thiab txhua tus xav kom tej haujlwm tiav sai mus rau qhov zoo, cov Tsavxwm ntawm HKM muaj cai taw ib cov neeg los ua kavxwm nrog lig ntau tes haujlwm raws li nram no:

- 2.01 Kavxwm Npaj Rooj Sablai
 Sau Npe
 Npaj Chaw Pw
 Npaj Suab Nrov (sound system)
- 2.02 Kavxwm Xaivtsa
- 2.03 Kavxwm Txhimkho
- 2.04 Kavxwm Nyiajtxiag
- 2.05 Kavxwm Npaj Yexus Rooj Mov
- 2.06 Kavxwm Faib Ntaubntawv
- 2.07 Kavxwm Saib Kev Pehawm Vajtswv
- 2.08 Kavxwm Tshuaj Thawj Tsavxwm Phau Ntawv Tshabxo
- 2.09 Kavxwm Suav Tibneeg & Tswj Txojcai Sablai Txwmxyoo
- 2.10 Kavxwm Komtswj (agenda)
- 2.11 Kavxwm Saib Kev Thov Vajtswv thiab lwm pab kavxwm uas cov Tsavxwm HKM pom zoo

3. COV TSWJ ROOJ SABLAI TXWMXYOO

- 3.01 Tus Tswjrooj: Thawj Tsavxwm HKM yog tus tswjrooj sablai txhua xyoo. Yog Thawj Tsavxwm muaj chaw tabkaum, nws muajcai cob lub meejmom tswjrooj rau tus Lwm Thawj Tsavxwm, lossis rau lwm tus, yog Lwm Thawj Tsavxwm muaj chaw tabkaum lawm thiab. Yog Thawj Tsavxwm thiab Lwm Thawj Tsavxwm xaiv tsis tswjrooj sablai, nkawd muaj cai cob lub meejmom tswjrooj sablai rau lwm tus.

3.02 Tus Teev Ntawv: Tus Teev Ntawv ntawm HKM yog tus teev txhua yam lus thaum sablaj txwmxyoo; muab cov lus uas nws teev tseg ntawd koj mus ntaus, luam, thiab koj rov los nyeem rau rooj sablaj txais yuav. Cov Tsavxwm hauv HKM muajcai tsa ib lossis ob tug los pab tus Teev Ntawv ua haujlwm hauv lub rooj sablaj txwmxyoo.

3.03 Cov Tsavxwm ntawm HKM: Thaum sablaj txwmxyoo, cov Tsavxwm ntawm HKM txhua tus yog cov nyob ze Thawj Tsavxwm thiab tus Teev Ntawv, pab sablaj thiab tawm tswvyim nrog tswj lub rooj sablaj mus rau qhov zoo.

4. FEEM MUAJCAI SABLAI (QUORUM)

Yog ib feem peb (1/3) ntawm cov neeg uas muaj npe tuaj sablaj txwmxyoo nyob txhij lawm ces rooj sablaj muajcai sablaj tau.

5. TXOJCAI TSWJ ROOJ SABLAI

HKM lub rooj sablaj txwmxyoo yuav siv Robert's Rules of Order los tswj lub rooj sablaj raws li ua tau.

6. TXOJCAI TSWJ KEV XAIV TSA

- a. Yog yuav taw ib leeg twg npe rau kev xaiiv tsa yuavtsum nrog tus ntawd tham uantej. Yog nws txaus siab ua lawm mam taw nws npe. Ib leeg tsuas muaj cai taw tau ib lub npe rau ib lub meejmom xwb.
- b. Yog pab Kavxwm Xaiiv tsa twb nrog ib leeg twg tham thiab taw nws npe rau ib lub meejmom (position), tiamsis nws tsis kam rau lawv taw, thov kom nws tsis txhob pub lwm tus (floor) taw nws npe los sib tw rau lub meejmom ntawd lawm.
- c. Tus uas yuav taw npe los xaiiv ua Thawj Tsavxwm yuavtsum yog ib tug Kws Xibhwb. Tus uas yuav raug taw npe los ua tus Cianyiaj yuavtsum tsis txhob yog xibhwb.
- d. Yog tus uas cov Kavxwm Xaiiv tsa twb taw npe lawm, lwm tus muajcai taw nws npe los rau lwm lub meejmom los tau, tiamsis tus uas raug taw ntawd yuavtsum mus rho npe tawm ntawm cov Kavxwm Xaiiv tsa es lawv thiaj muaj sijhawm mus taw lwm tus los hloov ua ntej kev tshabxo zaum ob. Tshwj lub meejmom Thawj Tsavxwm lawm, lwm lub meejmom yog leejtwg tau suab ntau dua tus ntawd yog tus tau. Yog hais tias muaj ob tug tau suab sib npaug, yuavtsum muab nkawd rov los sib tw dua kom ib tug tau.

- e. Yog lub meejmom twg muaj ib leeg xwb uas tsis muaj lwm tus los sibtw nrog ces thov yuav suab pomzoo ntawm lub Rooj Sablaj, tsuas tshwj lub meejmom Thawj Tsavxwm.
- f. Kev taw npe los rau hauv kev xaiv tsa ua Tsavxwm hauv lub Rooj Tsavxwm hauv HKM (DEXCOM) tsuas muaj cai taw tau ib tug los ntawm ib pawg ntseeg xwb thiab pab kavxwm nrog tus xibhwb lossis txwjlaug tham txog nws lubneej ntseeg.
- g. Cov uas ua haujlwm puvcaij (full time employee) hauv HKM tsis muajcai raug taw npe los rau cov meejmom Tsavxwm (DEXCOM) tsuas tshwj lub meejmom Thawj Tsavxwm thiab Lwmthawj Tsavxwm (Assistant DS) xwb. (RST 2011)
- h. Pab kavxwm tshawb nrhiav tus Thawj Tsavxwm ntawm Hauvpaus Koomhaum Hmoob yuav tsum muaj 5 leeg. Lub rooj sablaj yuav tau tsa pab kavxwm no ib xyoos uantej xyoo yuav xaiv tus Thawj Tsavxwm. Lawv lub sijhawm tsuas yog ua tib zaug xyoo xaiv tug Thawj Tsavxwm xwb. (RST 2017)

B. LUB ROOJ TSAVXWM NTAWM HKM

1. Lub Rooj Tsavxwm ntawm HKM yuavtsum muaj cuaj (9) leeg, xws li: Thawj Tsavxwm, tus Teev Ntawv, tus Cianyiaj, thiab rau (6) leej Tsavxwm. Tus Pab tus Thawj Tsavxwm (Assistant to the DS) muajcai koom lub Rooj Tsavxwm tiamsis tsi muajcai tawmsuab. Thawj Tsavxwm yog tus thawj ntawm lub Rooj Tsavxwm. (RST 2011)
2. Kev xaiv tus Thawj Tsavxwm thiab tus Lwm Thawj Tsavxwm (Assistant DS) cia xaiv raws li C&MA txojcai uas yeej muaj tseg lawm. Cov Tsavxwm yim (8) leej, plaub (4) leeg yog xibhwb thiab plaub (4) leeg yog txwjlaug (Layman). Tus Cia Nyiaj yog ib tug txwjlaug. Tus Teev Ntawv yog ib tug kws xibhwb. Nkawd muaj hnuvnyoog ua haujlwm ib zaug twg plaub (4) lub xyoos thiab ua tau ob (2) zaug sib txuas xwb. Yog kem ib zaug lawm nkawd muaj cai rov los ua tau. Ntawm rau (6) tus Tsavxwm (members at large) lawv hnuvnyoog ua haujlwm ib zaug twg yog ob (2) lub xyoos thiab ua tau 3 zaug sib txuas xwb. Yog hais tias kem ib zaug lawm lawv muaj cai rov los ua tau. (RST 2011)

Yim (8) tus Tsavxwm no cia pov ntawv hauv lub Rooj Sablaj Txwmxyoo. Leejtwg tau suab pomzoo ntau cia tus ntawd ua. Yog cov Tsavxwm yim (8) leej no leejtwg so tsis ua Tsavxwm ntxiv mus lawm, lub Rooj Tsavxwm muaj cai xaiv dua lwm tus los hloov tus ntawd chaw ua haujlwm mus txog caij xaiv dua tus tshiab.

3. Yog Thawj Tsavxwm ncaim ntiajteb, so haujlwm, sav cev, ua tsis taus haujlwm ntxiv, lossis raug rho tawm, Board of Director ntawm C&MA mam ua tus nrhiav ib tug hloov nws chaw mus txog hnuv xaiv tsa.

C. TEJ PHAB HAUJLWM (DEPARTMENT) NTAWM HKM

Cov Tsavxwm ntawm HKM muaj cai yuav ntxiv thiab rho tej phab haujlwm ntawm HKM lawv li lawv pom zoo. Kev nrhiav tus thawj (director) ntawm tej phab haujlwm kom ua raws li kevcai ua haujlwm (Office Policy) ntawm HKM. Lawv tes haujlwm (Job Descriptions) cia rau cov Tsavxwm li mam ua tus muab. (RST 2011)

D. COV KAVXWM LWMYAM (STANDING COMMITTEES)

1. KAVXWM TAWM NTAUV & TSAWBKWS UA XIBHWB (TTX)

HKM ib pab tub kavxwm saib kev tawm ntawv thiab tsawbkws ua haujlwm rau tej xibhwb thiab ua haujlwm rau hauv HKM. Cov kavxwm no yuavtsum muaj tsis pub tsawg tshaj tsib (5) leeg thiab txhua tus kavxwm yuavtsum yog cov Tsavxwm ntawm HKM tsa thiab lawv yuav los ua haujlwm pib (3) lub xyoos. Thaum xaiv tau lawv lawm, lawv mam li xaiv tus Thawj thiab tus Teev Ntawv.

- a. Thawj Kavxwm Tes Haujlwm:

- i. Nws yuav tau qhia thiab cob haujlwm rau pab Kavxwm TTX txhua tus kom nyias xyuas nyias tes haujlwm kom tiav raws li lub sijhawm uas tau teem tseg.
- ii. Nws yuav tau npaj thiab saib kev kawm ua xibhwb tshiab kom mus raws nraim li C&MA teev tseg.
- iii. Nws yog tus tswj lub Rooj Tsawbkws thiab kev tsawbkws.

- b. Tus Teev Ntawv

Nws yog tus teev tej lus sablaj txhua yam hauv lub Rooj Kavxwm TTX thiab ua haujlwm raws li tus thawj kom nws ua.

- c. Txojcai thiab Haujlwm Ntawm Lub Rooj TTX.

Lub Rooj TTX muaj cai yuav ntsuas tej tus xibhwb uas raug xa tuaj thov kev tsawbkws saib leejtwg tsimnyog ua kev tsawbkws rau. Lub Rooj TTX muaj cai yuav cobqhia thiab qhuabntuas cov yuav raug tsawbkws kom paub thiab ua tau lub neej raws li lub meejmom Kws Xibhwb. Lub Rooj TTX yuav ua kev tsawbkws rau tej tus uas teb dhau kev ntsuas tsawbkws, thiab cob ntawv yeebkoob Kws Xibhwb rau tus ntawd raws li kevcai tsawbkws. Lub Rooj TTX yuav qhia thiab txhawb zog rau tej tus uas tsis dhau kev ntsuas tsawbkws kom nws dhau lwm zaug.

d. Kev Tawmntawv Ua Xibhwb Tshiab

Tus yuav raug tawmntawv ua xibhwb tshiab yuavtsum tau ua tej yam li nram no:

- i. Yuavtsum xa cov ntawv povthawj hais txog nws kev kawm ntawv tiav hauv Bible College, Seminary, lossis CLA tuaj rau cov Kavxwm TTX.
- ii. Kawm tej phau ntawv uas cov Kavxwm TTX tau teev tseg.
- iii. Tuaj rau cov Kavxwm ntawd nug (oral exam).
- iv. Yog tus twg twbraug C&MA nug thiab tshuaj dhau lawm, nws yuavtsum tau kom C&MA xa nws cov ntaubntawv tuaj rau cov kavxwm no.

e. HKM muajcai hu tug kawm taag Ministerial Study Program (MSP) ntawm Hmong Christian Institute (HCI) moog ua xibfwb rua tej pawg ntseeg (RST 2023)

f. Txij li 8/24/91 no mus, tus xibhwb hluas twg yuav pojniam hnuvnyoog yau es ua tsis tau ntawv sib yuav mas HKM yuav ncuat tsis pub nws ua xibhwb mus txog hnuv uas nws ua tau ntawv sibyuav raws li nomtswv kevciai.

g. Kev Kawm Ua Kws Xibhwb

Txhua tus uas yuav raug tsawbkws ua Kws Xibhwb yuav tau ua raws li nram no:

1. Xa ntawv povthawj (official transcripts) uas hais txog nws kev kawm ntawv tiav nyob hauv Bible College, Seminary, lossis CLA tuaj rau cov Kavxwm TTX.
2. Kawm tej phau ntawv uas C&MA tau teev tseg.
3. Sau cov ntawv ntsuas nws kev ntseeg raws li cov Kavxwm TTX kom sau thiab xa rov tuaj rau cov kavxwm ntawd.
4. Tuaj rau cov Kavxwm TTX nug (oral exam).

h. Kev Muab thiab Rho Xibhwb License

Kev muab thiab rho xibhwb license cia ua raws li C&MA Uniform Policy. (RST 2011)

2. KAVXWM TXHAWB KEV XA MOO ZOO (MISSION MOBILIZATION)

Cov kavxwm no muaj tsib (5) leeg thiab yog Rooj Tsavxwm ntawm HKM tsa. Lawv hnuvnyoog ua haujlwm yog ob (2) lub xyoos. Lawv tes haujlwm kom ua

rawsli HKM txoj kabke (policy) uas twb muaj lawm, thiab pab tsa lub rooj txhawb nqa kev xa moo zoo ntawm HKM thaum lub rooj sablaj txwm xyoo. (RST 2013)

3. KAVXWM TSHUAJ NYIAJTXIAG

Kev tshuaj nyiajtxiag ntawm HKM yuav tau ntiav lwm lub koomhaum tshuaj nyiajtxiag tuaj tshuaj HKM tej nyiajtxiag ib xyoos twg ib zaug. Dua li no, HKM yuav tau tsa pab kavxwm Audit Review Committee los tshuaj saib tej ntaub ntawv uas lub koomhaum tshuaj nyiajtxiag twb tshuaj tag lawm saib puas muaj tej yam uas yuav tau kho thiab yuav tau tshabxo rau lub Rooj Sablaj Txwm Xyoo paub. Lawv muaj cai los tawm tswvyim rau lub Rooj Tsavxwm ntawm HKM txog kev khaws nyiajtxiag kom mus raws li nomtswv kevcai. (RST 2011)

4. KAVXWM KEVCAI LIJCHOJ NTXIV (KKLN)

Cov kavxwm no muaj tsib (5) leeg thiab yog lub Rooj Tsavxwm ntawm HKM tsa. Lawv hnuvnyoog ua haujlwm yog plaub (4) xyoos. Lawv tes haujlwm yog txhimkho kevcai lijchoj ntxiv rau HKM. Lub Rooj KKLN no tsuas ua tau haujlwm raws li Thawj Tsavxwm, lub Rooj Tsavxwm, lossis lub Rooj Sablaj txwmxyoo ntawm HKM tso cai rau lawv ua xwb.

5. KAVXWM NRHIAV CHAW SABLAI TXWMXYOO

Cov Tsavxwm ntawm HKM yog cov txiavtxim siab yuav npaj lub rooj sablaj txwm xyoo rau qhov twg uantej ob (2) lub xyoos thiab taw (3) leeg uas nyob ze lub nroog ntawd nrog rau Thawj Tsavxwm mus nrhiav chaw thiab npaj kom txhij.

6. KAVXWM SAWVCEV HKM MUS KOOM C&MA ROOJ SABLAI TXWMXYOO

Cov kavxwm no yuavtsum tau xaiv raws li C&MA Kevcai Lijchoj (General Council A3-4) thiab lawv muaj hnuvnyoog ua haujlwm 2 xyoos thiab ua tau 3 zaug sib txuas xwb. Cov kavxwm no yuavtsum yog nws pawgntseeg ua tus them nqi taugkev thiab HKM ua tus them nqi nojhaus thiab chawpw. Cov kavxwm no cia rau lub Rooj Sablaj xaiv, thaum xaiv tau lawm, leejtwg yuav sawvcev rau tes haujlwm twg cia cov Tsavxwm hauv HKM mam ua cov taw.

7. KAVXWM SAIB PEEV NYIAJ PAB COV KAWM VAJLUSKUB

Cov kavxwm no yog cov Tsavxwm ntawm HKM tsa, yam tsawg tsis pub tsawg tshaj 5 leeg nrog rau Thawj Tsavxwm hauv HKM. Lawv hnuvnyoog ua haujlwm yog peb (3) xyoos. Cov kavxwm no tes haujlwm yog li nram no: (RST 1996)

- a. Saib cov nyiaj uas sawvdaws xa tuaj rau peev nyiaj uas pab cov kawm Vajluskub uas muaj teev nyob Phaj VII.
- b. Nrhiav nyiajtxiag los rau peev nyiaj no.
- c. Muaj cai txiavtxim siab siv cov nyiaj no mus pab cov kawm Vajluskub raws li lawv pom zoo.

8. KAVXWM NIAMTSEV

Koomhaum Niamtsev ntawm Hauvpaug Koomhaum Hmoob kom ua raws li Alliance Women Handbook (2021-2022 Edition). (Adopted 2022).

9. KAVXWM TXIVTSEV

Koomhaum Txivtsev ntawm Hauvpaug Koomhaum Hmoob kom ua raws li HD Men's Ministry Policy. Tiamsis hais txog ntawm kev taw tus thawj txivtsev yuav tsum tsi yog ib tus thawj xibhwb. (Adopted 2022).

PHAJ IV: COV XIBHWB

A. XIBHWB KEV SO

1. Vacation: Txhua pawgntseeg uas zwm rau HKM muab sijhawm so haujlwm ib lub xyoos twg 4 lub limtiam lossis tshaj li ntawm pawgntseeg pom zoo rau txhua tus xibhwb uas ua haujlwm puv sijhawm (full time) suav txij lub 1 hlis xyoo 2001 no mus. Cov xibhwb uas ua haujlwm tsis puv sijhawm (part time) cia rau pawgntseeg mam li nrhiav kev pab li pawgntseeg muaj cuabkav pab tau.
2. Sabbatical leave
 - a. Eligibility: Ib tug xibhwb twg uas ua haujlwm rau ib pawgntseeg twg puv peb (3) xyoos txwm mas nws muajcai thov so sabbatical li ntawm 30 hnuv. Yog tus xibhwb twg ua haujlwm rau pawgntseeg ntawd nto 6 xyoos mas nws muajcai thov so sabbatical li 45 hnuv, thiab txhua txhua peb (3) lub xyoos tomqab mus. Tib lub sijhawm uas xibhwb so sabbatical mas yuav tsis pub nws siv nws cov vacation sibxyaw nrog uake. Yog tus xibhwb ntawd mus nyob rau pawgntseeg tshiab, nws yuav tau rovqab cuab cov xyoo ua haujlwm tshiab li saum no dua.
 - b. Tus nqi (cost): Thaum twg cov tsavxwm hauv pawgntseeg pub xibhwb so sabbatical, cov tsavxwm hauv pawgntseeg ntawd yuav tau npaj ib cov nyiajtxiag rau hauv lawv daim peevnyiaj puagxyoo (annual budget) coj los pab rau lub sijhawm uas lawv tso lawv tus xibhwb mus so sabbatical. Lawv tus xibhwb yuav tau cov nyiaj hli thiab cov benefits tsis tuncua rau lub sijhawm ntawd.

- c. Cov tsavxwm hauv pawgntseeg yuav ua cov sojntsuam saib lawv tus xibhwb tes haujlwm so sabbatical li no ua raws li tau coglus tseg (conditions) nramqab no:
1. Lub sijhawm uas xibhwb tabtom so sabbatical no, tsis pub kom xibhwb siv lub sijhawm no mus nrhiav lwm txoj haujlwm.
 2. Tus xibhwb ntawd yuavtsum yeem nrog pawgntseeg ntawd nyob mus kom puv ib xyos tomqab uas pawgntseeg ntawd pub nws so sabbatical. Yog tus xibhwb ntawd mus rau ib qho qhovtwg vim muaj kev yomceev (emergency) los yog tej xwmtxheej tshwjxeeb (special situation), tus xibhwb ntawd yuavtsum them cov nyiajtxiag uas nws tau txais (receive) los ntawm pawgntseeg kom puvnpov rovqab rau pawgntseeg rau lub sijhawm uas nws tau so sabbatical no.
 3. Xibhwb yuavtsum sau ntawv qhia tes haujlwm uas xibhwb xav ua kom tshwmsim rau cov tsavxwm hauv pawgntseeg paub (saib daimntawv thov so sabbatical tomqab).
 4. Thaum uas tus xibhwb ntawd so sabbatical puv hnuvnyoog lawm, nws yuavtsum sau ib tsabntawv tshabxo yam tsawg tsis pub kom tsawg tshaj 5 nplooj (5 pages) cob rau cov tsavxwm hauv pawgntseeg thiab rau Thawj Tsavxwm hauv HKM. Tus xibhwb ntawd yuavtsum sau nws tsabntawv tsis pub kom dhau 3 lub hlis tomqab uas nws rovqab los cuab ua nws tes haujlwm. Nws yuavtsum qhia txog tes haujlwm uas nws ua tau tiav thiab hais txog hais tias nws tes haujlwm muaj feem pab rau nws txojkev lojhlob huamvam ntawm nws pawgntseeg.
 5. Xibhwb yuavtsum sau ntawv thov so sabbatical 6 lub hlis uantej uas nws yuav mus so.

B. XIBHWB NYIAJ HLI

Xibhwb nyiaj hli cia tej pawg ntseeg muab raws li kev noj haus hauv lub nroog thiab lub xeev uas pawgntseeg nyob ntawd saib kim los pheejyig; tiamsis thov kom pawgntseeg muab kom tsimnyog thiab txaus noj txaus haus rau xibhwb.

Ib xyos twg lub rooj tsavxwm hauv pawgntseeg yuav tau nce nyiaj hli rau xibhwb ib zaug. Kev nce nyiaj hlis rau xibhwb yog lub rooj tsavxwm li haujlwm thiab tsuas koj mus rau pawgntseeg pom zoo txais yuav xwb.

C. KEV NOJHAUS RAU COV XIBHWB RAUG HLOOV HAUJLWM

Yog ib tug xibhwb uas tau ua haujlwm rau pawgntseeg thiab tau txais nyiaj hli los ntawm pawgntseeg xwb, raug hloov thiab tsis tau muaj haujlwm tuav, pawgntseeg uas nws nrog

nyob ntawd yuavtsum tau pab ib lub nyiaj hli rau tus xibhwb ntawd; tiamsis yog tus xibhwb thov tawm haujlwm ces nws yuav tsis tau txais ib lub nyiaj hli ntawd.

D. XIBHWB KEV FAJSEEB KHO MOBNKEEG (HEALTH INSURANCE)

Yog ib tug xibhwb twg ua haujlwm puv caij (full time) rau ib pawgntseeg lawm, pawgntseeg ntawd yuav tau yuav kev fajseeb kho mobnkeeg rau tus xibhwb ntawd thiab nws tsev neeg.

E. XIBHWB KEV COBQHIA (PASTOR RETREAT)

Thawj Tsavxwm (DS) yuav tau npaj muaj pastoral retreat rau cov xibhwb thiab niam xibhwb ib xyoo twg ib zaug. Txhua yam expenses rau xibhwb thiab niam xibhwb mus koom yog pawg ntseeg them.

F. XIBHWB NYIAJ FOOBXAB (BURIAL FUND)

HKM npaj muaj ib peev nyiaj ua nyiaj foobxab rau cov xibhwb (Hmong District Protective Benefit Plan), (RST 1989). Kev tswj peev nyiaj no kom ua raws li Hmong District Protective Benefit Plan qhov kabke. (RST 2013)

PHAJ V: NTAUV TSO CAI RAU TXWJLAUG UA VAJTSWV HAUJLWM

Peb cov ntseeg kuj muaj ntau yam kevcai uas yuav tsum tau ua, yog li, HKM thiaj tso cai rau Thawj Txwjlaug lossis Thawj Tsavxwm ntawm tej pawgntseeg uas tsis muaj xibhwb ua kevcai thiab kabke rau cov ntseeg. Ib yam uas tsis tso cai rau ua yog kabtshoob kevkos uas yuav tsum tau ntawv ntawm nomtsww.

PHAJ VI: NYIAJ PAB HKM

- A. Txhua pawgntseeg uas zwm rau hauv HKM yuavtsum xa 10% ntawm cov nyiaj uas sau tau hauv txhua lub hlis tuaj rau HKM ua haujlwm, tsis pub dhau hnuv tim 10 ntawm txhua lub hlis. Cov nyiaj 10% tsuas xam cov nyiaj uas sau los pab pawgntseeg kev khiav haujlwm (general operating fund or general receipts) xwb, tsis xam cov nyiaj sau npaj yuav tuamtsev (building fund), cov nyiaj sau pab Kev Xa Moo Zoo (Great Commission Fund) lossis lwm yam kev xa moo zoo, thiab tej nyiaj uas sau tshwjxeeb (designated fund). (RST 2011)
- B. HKM muajcai sau ntawv thov nyiaj ua haujlwm raws li kev siv nyiaj uas lub Rooj Sablaj Txwmxyoo tau kom tseg lawm.

PHAJ VII: NYIAJ PAB COV KAWM VAJLUSKUB

- A. HKM yuav muab cov nyiaj uas cov tswvcuab xa tuaj pab rau cov kawm Vajluskub qib siab thiab cov uas kawm hauv C&MA tej tsev kawm ntawv (Bible Colleges). Yuav pab rau cov uas kawm mus rau 6 yam li nram no:

1. Cov kawm Pastoral lossis Church Ministries
 2. Cov kawm Missions
 3. Cov kawm Christian Education
 4. Cov kawm Church Music
 5. Cov kawm Youth Ministries (RST 1995)
 6. Cov kawm Bible and Theology (RST 1995)
- B.** Yog leejtwg kawm tsis tiav lossis kawm tiav tiamsis tsis los ua haujlwm rau HKM, nws yuav tau them cov nyiaj uas HKM tau pab nws lawm rov qab rau HKM kom thiaj muaj nyiaj pab cov kawm tshiab mus ntxiv.
- C.** Yog tus tub kawm Vaajluskub twg yuav pojniam uas tsis tau ntaubntawv sibyuav, HKM yuav tsi pab nyiaj scholarship rau nws. (RST 2011)

PHAJ VIII: KEV DAWS TEEBMEEM HAUV PAWGTSEEG THIAB HKM

- A.** Kev daws teebmeem hauv pawg ntseeg thiab hauv HKM yuav siv C&MA tus Uniform Policy on Discipline, Restoration, and Appeal.
- B.** Cov Tsavxwm ntawm Hauvpaus Koomhaum Hmoob muaj cai txiavtxim siab muab tej pawg ntseeg uas tsis muaj nyob lawm tej vajtsev losis cuabyeej cuabtam muag losis thim rov rau tus uas lawv tshuav nuj tshuav nqi kom zoo lawv li pawg ntseeg thiab Hauvpaus Koomhaum Hmoob qhov uas lawv yuav tau. (RST 2017)

PHAJ IX: KEV HLOOV

Txhua yam uas sau rau hauv phau Kevcai Lijchoj Ntxiv no yeej muaj cai muab kho dua tshiab tau xwli: tsub ntxiv rau, rho tawm ib txhia, lossis rhuav cov lus qub es hloov dua cov lus tshiab rau, tiamsis yuavtsum yog HKM Rooj Sablaj Txwmxyoo pom zoo txog 2/3 mas thiaj hloov tau. tshwj cov lus sau yuamkev (misspellings), teev tsis yog (inaccurate numbering or inaccurate cross reference), lossis sau tsis meej (simple edits) uas yeej tsis hloov lub ntsiab lus.

Pab Kavxwm Kevcai Lijchoj Ntxiv xwb thiaj muaj cai kho cov lus sau yuamkev, teev tsi yog, lossis sau tsis meej uas hais los saum no. Cov lus kho uas hais los saum no tsuas yuav tau (officially adopted) yog tom qab HKM Rooj Tsavxwm (DEXCOM) twb pom zoo lawm. HKM Rooj Tsavxwm lossis pab Kavxwm Kevcai Lijchoj Ntxiv mam ua ntawv qhia cov pawgntseeg tej qhov uas raug kho. (RST 2013)